

四庫全書

集部

欽定四庫全書

集部
中庵集卷一至三

詳校官中書臣張虎拜

侍讀臣孫球覆勘

膳錄副貢生臣杭光晉

膳錄監生臣任溥

膳錄監生臣黃鐘

欽定四庫全書

集部五

提要

中菴集二十卷

別集類四元

臣等謹案中菴集二十卷元劉敏中撰敏中字端甫章邱人由中書掾歷官至翰林學士承旨卒追封齊國公謚文簡事迹具元史本傳史載敏中中菴集二十五卷文淵閣書目作五冊不著卷數梁維樞內閣書目不載其

名則是時官書已佚明人藏書之家惟葉盛
葉竹堂書目僅著于錄亦無卷數黃虞稷千
頃堂書目雖有其名而獨作三十五卷與史
不符蓋虞稷所列諸書乃徧徵各家書目為
之多未親見其本故卷數多訛存佚不確未
可盡援為據也蘇天爵元文類中僅載其賀
正旦表忠獻王廟碑二首其他作則不槩見
今從永樂大典所載蒐羅裒輯以類編次尚

可得二十卷則所佚者不過十之二三矣其
詩文率平正通達無鈎章棘句之習在元人
中亦元明善馬祖常之亞本傳稱其文理明
辭備韓性原序亦謂其不藻績而華不琢鏤
而工戶樞門鍵庭旅陞列進乎古人之作固
不誣也史稱敏中為御史時劾權臣僧格為
集賢學士時上書陳十事其文令皆不見集
中殆已散佚集中有星變奏議皇慶改元奏

議則為本傳所未及蓋史佚之其金石之文如巴延廟碑哈喇哈斯沙扎該丹達爾耀珠布哈爾李唐諸神道碑記大智全寺碑罔極寺碑皆承詔撰述之作今考元史哈喇哈斯傳即用敏中所撰墓碑然不載其在宗正時從世皇北巡猝遇亂突出破敵事又不載其在中書省時每退食延見四方賓使訪以物情得失吏治否臧人材顯晦年穀豐歉采可

行行之數語又度地置兩倉句兩字訛為內
字沙扎該傳亦用敏中碑而其子丹達爾諭
降襄陽取漢口破婺賊功不在沙扎該下而
沙扎該傳末乃僅附其子昂阿喇名無一語
及丹達爾事尤為舛漏蓋元史倉猝成書疎
脫實多不但重複割裂如顧炎武所譏則是
集之存併可以訂史傳之訛異不徒貴其文
章矣乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

原序

聲音與政通而文詞者聲之寓也不觀夫大化之流行
哉一元所寓衆彙有得色激者為霆散者為風騫者植
者舒者吸者柔且縵者若金奏若萬鼓振而餘烏烏聲
萬不同其生物一也春出而發之三時奉而成之歲功
以植元化以行然其機之發矢躍而輪運目不得瞬尚
可搏而執之哉於是神瞽度律均鐘則其自然而寓之
於數贊陽出滯修絜萬物始乎宇宙之間而伶倫之傳

因之而不泯可謂盛矣若昔勦業之君體元出治千載
之下洋洋乎如倡而復歎之不足非有寓於文辭之間
哉國家肇造區夏世祖皇帝昭顯文治若歲之陽協風
自應當是時搢觚簡奏技仗內者皆天下士所為文詞
皆足以荅鈞天之球而譜雲和之奏後世歎息瞻仰以
為不可及其乘風雲而流聲實者固已衆矣中庵劉公
以文學受簡知致身通顯朝廷典冊鉅公銘誄所著為
多而集藏於家學者願見而不可得總管魏公公子壻

也將刊以傳於代余觀公之文不藻績而華不琢鏤而工不屈折條榦而扶疎茂好戶樞門鍵庭旅陞列進乎古人之作矣其所紀載足以裨太史之闕傳之後學傳誦玩繹得以審中和之聲而窺聖人德化之盛教思無窮非其他別集所可擬也魏公俾性為之叙辭不獲謹誦所聞附於篇端年月日韓性序

欽定四庫全書

中庵集卷一

元 劉敏中 撰

賦

勵志賦

余讀書既冠殊拙於生理其於求田問舍之事遑然不知也然給養之資日以艱窘恐以貧乏累其志氣乃作勵志賦以自勉其詞曰
吁咄哉何天之生我也悟然而有知既不能粹我以超

然而智兮又不能愚我以朦然而癡自親生之膝下兮
固亦知愛敬之日孜元氣假我以五常兮父母鞠我以
恩慈逮總角之嬉戲兮導我以文字為學之規既庭訓
之祇受兮亦學禮而興詩信聖之不我欺兮日是誦而
是師知仁義之為美兮以忠信而自持紉秋蘭以為佩
兮服薜芷與江離審先民之行為兮獨憤然而永思既
踴躍以欣慕兮亦慷慨而傷悲彼皋陶之在上兮既帝
載之克熙釋耒耜以天下自任兮永徽烈乎商伊辭傳

巖以即相兮豈時運之或奇也哉夫何三閭之憔悴兮
沈溺乎江之湄賈誼脩其軒舉兮忽長沙之棄遺嗟小
人之紛擾兮莫不移世以阿時既靡靡以自安兮亦賄
賄以相危恃其志之已得兮惟侈縱之日滋苟一時之
榮耀兮實萬世之嗤也茲既通塞之異軌兮何清濁之
不可力而推也蹇余生之北辰兮抱寸誠以孳孳企古
人之悠邈兮喟遑遑其欲追擬修名之屹立兮以聖道
而自期春與秋其代序兮日月忽其若馳翔世途以徘徊

徊兮撫斯文以嗟咨時既與我齟齬兮事與我而相違
學澶漫而未精兮形瘵弱其神疲顧生資之迫狹兮慮
給養之莫支余既不能規規於田舍兮又不能求龍斷
而登之望朱門而將進兮無愉色與妍辭願得羽翼如
雲之我身兮余將薄六合而遠飛又欲浮靈槎於滄海
兮泛崑崙以遊嬉乘天風以越閭闔兮訪王母於瑤池
餌金砂以煉質兮漱瓊液以生肥跨鸞鶴以為馭兮儼
雲霞以為衣亦知茲懷之不可必兮竟鬱鬱以安歸已

焉哉蓋士於世也窮達否泰詎能極兮姑俯仰而隨宜
幸孔門之可以倚依兮依顏曾以棲遲從衆人之相易
兮保良心而靡移聽天命以升沈兮余終不能若兒女
子之所為也

東山賦

東山者實長白山也自歷城觀之故言東山
時吾友人智仲敬寓迹於茲山之左故作東
山賦以叙相憶之意云耳

歷城之東直望百餘里見雲峰之嶠堯實曰長白傲然
今古橫絕於層霄崖崩壁削嵐飛烟薄兮變氣候於昏
朝麋鹿遊而猿鶴哀鳴兮木無風而蕭蕭念佳人兮此
留度期會兮何遙想夫君兮安適抑余懷之罔極或登
高而望遠亦沈吟而太息窮仙臺之勝境訪黌堂之遺
迹慨然長歌而悲嘯忽風驚而雲析山泉鳴兮筆雨寒
山光動兮酒波碧發壯懷於塵世飛妙墨於石壁仰蒼
穹兮何言撫丹心兮誰識頓騏驥之駿足戢鴻鵠之勁

翻亦必能掃情而滌思聽其時而自得望夫君兮安至
憂紛紛兮心醉知危樓之幾登越河橋兮再四目蒼波
之東注恨白日之西墜每當渴君之德望君之顏兮空
徘徊把酒挹夫東山之餘翠

奉試俊民甸四方賦

運啟明主時多俊民列庶位以咸若甸四方而有因偉
茲間出之賢優加委任治爾攸同之域盡入陶鈞書曰
民罔胥匡也賴君寵綏君不偏愛也須臣共理然英特

之士弗得而用則治化之功曷從而起載惟此故任三
俊以為先聲自于今甸四方而有以以爾瑚璉之秀梗
楠之良抱經世之才者乃稷乃契明撫字之術者如龔
如黃上果純於任使世可拱於平康藹藹盈庭覲爾雲
集之士皇皇奠枕安于斗制之方夫何澤周人物之繁
教被海隅之四外張國勢之隆盛內格邦風之純粹良
由妙於選賢使之在位有文學有德行以次而升自南
北自東西不勞而治惟賢臣乃能弘聖主之業而君子

所以為邦家之基方國必欲旬也俊民其何舍之以見
周任仁人國果聞於昌熾殷獲良弼邦自底於安綏是
知民區甚遠也難徧於照臨事幾至微也孰知其紀統
必求治效之克即可不人材而與共不然何以疏詳方
朔云得士則乃昌傳質班生謂惟賢而是用已而公道
無壅俊民必登忠殫今力竭害除今利興翕若四方之
作又截然庶績之不凝如是下彰報國之勞咸伸素願
上享得人之逸益介休徵大凡當世之安皆本真賢之

進舜帝以是而大闢於仕路唐堯以是而克明於登俊
方今網羅天下之賢才而甸夫四方功業遠超於堯舜

臘粥賦

原注戲為
智仲敬作

東里先生臘辰入學為諸生設粥以應故事方其為粥
也戒竈厨之神潔錡釜之器屏黜異饌掃除邪味意以
清而取奇物以多而為貴於是勅老庖役臺輿雞未鳴
而先起咸受命而奔趨積薪若山貯水成湖大杓巨盎
後列前敷浙長腰之玉粒瀉小豆之紅珠破霜粟之金

九眉山藥之瓊膚紛衆材之畢集俾效用於一區方相接其未久迹難混而猶踈逮夫坎離既濟之後庚癸相合之初翕和氣之回春

一作雲蒸

破臘寒於須臾乍蚯蚓之

一鳴忽秋蟲之滿廬俄而怒風遠來萬竅號呼撼千丈之長松響十里之楸梧少焉則驚湍拍堤急溜鳴渠漸威聲之衰息方訟語之囁嚅復若泣以若叱亦或吹而或欬忽蓬蓬然告熟恍融蠟以凝酥品色香之殊絕賞至味之芳腴笑倉惶於公孫陋咄嗟於齊奴彼黃冠與

緇衣方擊鐘以鳴魚雖大同而小異詎可企吾之清虛
于時朝日升陽和舒烏丸炯兮映窓獸煤烘兮滿爐則
有玄齡稚兒青衿小儒若驥之子或鳳之雛咸鞠躬而
來思矜步武之襜如揖先生而登堂各齒列乎坐隅比
粥令之一行皆攫椀以擎盃俄乚鳴而頰響驚齊譟於
千夫類昆陽之戰酣捲百萬以如無先生熟視撫掌助
聲勢而奮鬚謂吾黨之能事快雄俊之起予顧童子其
何知已鼓腹而奔衢矣先生於是餘勇未歇食思方騁

取穀氣之精華喜漸入於佳境促孟光之舉案方緩帶
而笑領鄙勺飲之孱懦空數杯於俄頃已而玉池之水
生甘詩腹之雷不鳴和暢五神驅除三彭杜邪疾於他
日養浩氣於平生彼東坡之玉糝與吳下之蓴羹較功
用於錙銖蓋未許其同盟況乎周顗之災孝儀之鯖皆
潛伏於酖毒亦何恤乎羶腥將奔避之不暇尚安敢嬰
吾鋒而抗吾衡也先生乃曠然心平融然氣和舒然而
伸悠然而歌歌曰以不殺而仁兮吾何憂既易得而易

足兮吾何求諒此味之天成兮吾何以酬雖然無用山
澤之癯兮猶可以為肉食之謀也

騷

思蘭辭二首并序

大易稱同心之言其臭如蘭屈原著離騷以
香草譬君子有滋蘭紉蘭之語則蘭之見重
于世久矣吾黨張君智甫隱居好古取蘭江
南植之家園月養歲滋九畹可待且命其所

居之室曰楚香食飲起居必與蘭對得君子
同德之義若是蘭與人偕重矣然余徒知重
其所重而蘭則未見也乃擬楚詞作思蘭吟
二首貽智甫俟他日醉楚香堂歌以為蘭慰
其辭曰

蘭生兮猗猗其芳兮菲菲山空兮無人水濺濺兮石累
累楚魂不歸兮夫誰與期儼高潔兮自淑諒無待兮奚
悲胡寸根遠播弗瘁而且宜兮曰美人禮我而不我疑

同臭協德兮尚庶幾愛之兮不見悵余思兮眷眷

蘭生兮修修其芳兮幽幽山空兮無人樹林陰兮猿猱
愁楚魂不歸兮夫誰與儔儼高潔兮自淑諒無待兮奚
尤胡寸根遠播弗瘁而且售兮曰美人禮我而我息我
遊同臭協德兮庶久留愛之兮弗得悵余思兮惻惻

五言古詩

送胡學士紫山

去古日已遠正路多迷踪衆說撓六經嘖嘖紛異同繁

音笑雅頌冶容銜青紅風雲與月露一字誇餘工譬如
膏肓疾不受砭劑功自非名世賢反正難為功寥寥幾
何時得我中庸公公姿何神秀自是間氣鍾蔚蔚天上
麟矯矯人中龍斯文入掌握造化盤心胃吐辭爛星斗
落筆驅雷風傳寫聖人意秘奧咸開通奇偉出韓柳正
大續軻雄垂紳玉堂上文風變區中賤子生陋壤志學
不知宗北驚駕南轅失計為雕蟲居然守迂僻無由去
顛蒙公來幸一見談笑及從容快意徒仰美摳衣遽難

從明朝驛亭外憑高望飛鴻

上吏部官

潭潭六卿府從事須良能昭昭貢舉法四海拔精英邇
來數歲間羣才鬱崢嶸賤子乃何人鶚章辱再騰勉強
從計吏北達天子京始謁高吏部獻書頗為驚處以禮
樂事為言案牘輕俄復移秋官眷顧亦屢承但惟棲宿
卑不敢伸吭鳴頃聞更變議去留在權衡讀書三十年
區區欲何成

題褚真人畫像

董兵部野莊請題至元二十年癸未歲也

神仙真有無恍惚初未知今看褚君像信有不復疑森
然為起敬清風見須眉世固有甚難乃爾獨優為乾坤
運華峰躋絕旁無基壁立三萬仞登陟誰敢希千年神
巧在鐵鎖懸烟霏烟霏何冥冥目斷猿猱悲此老緣下
上欲赴孤鶴飛窮冬冰雪合偃卧絕新炊三月餓不死
出門愈光輝豈知老讀書左氏尤精微山空人響絕時

擾虎與羆聖朝重遺賢必欲一致之稽首謝使者不肯
踏京師此事世共見可見不可追諒惟飛仙骨有此傑
異姿所向雖匪中貪懦足以規何用多變化坐貽聾俗
欺

張御史周卿雪中送詩以不一相過見責次韵
答之二十四年正月

君有山水癖一昔落湘浙浩蕩三年遊寒衝風與雪曾
中太史筆萬怪入搜閑歸來一笑粲頗訝鬚髮白靜夜

孤高吟不覺燭燼滅
矍然愈我病慄慄膽
內怯雪寒豈相忘適
有不速客遂非諒無
補媿使面增熱

賦田潤之經歷家臘月菊

原注元貞元年濟南

細菊含幽姿有約在
晚秋金商下白露衆
卉皆俗流胡復冒歲
寒爛熳方未休居然
冰雪間乃與松柏儔
清貞入苦節剛介出
至柔諒知根性殊越
絕獨爾尤念汝實後
時蕭蕭亦何求三嗅
成短詠因之以消憂

野歌

平生崑穴姿憶昔落此間舉杯謝野客浩歌對青山絲
竹協律呂清響雜哀彈焉知有至音無往亦無還

原注
大德

二年戊
戌歲也

題鬪榭軒

倏然兩虬龍怒戰一庭黑須臾風雨過兀爾蒼榭立吁
此耳目觀世事何有極

野亭

野亭望西山一綠開晴蕪亭下江水流不亟亦不徐照

見亭上人巾袂方舒舒勿煩顏成子區區問何居

大德二年戊戌秋再用古風韻答杜彥明成伯

謙見和

遺音整絕絃墜典尋破壁頭白未聞道坐費歲月歷一
隨簡書命乃爾南復北鷺鳥乏修翎凡馬蔑餘力較技
騏驎後効能鵬鶚側所任非所堪何異火就濕惶回失
故步勉強懷媿色偶然兩幽人瀟灑冰雪立欣然肯下
榻新釀瀉秋碧傾倒見真賞欸曲多暇日微言洗我心

妙理通翔集山田故應在幸不畏乾溢逝將返舊耕脫
此外物役國恩無所報回望空怵惕

彥明伯謙再和亦復和之

紛紛蟻爭場繞繞蝸附壁十年塵土夢世味亦頗歷憶
昨出京時始見征雁北荒陂入野迥春姿淡無力如今
留他州坐閱斗柄側寒廳靜愁思暮雨黃葉濕諒微熙
奮功顯有勞瘁色侵尋歲聿晚瑣屑事巨立晨興倚危
樓遙望故山碧相期有宿約定復歸幾日人生足離合

樂事難并集旁有能詩仙氣若湖海溢揮毫灑玉屑俗
累非所役一笑傾酒壺為我洗慚惕

貞婦和拉蒙古人寓濱之渤海其夫托果岱歿
于軍誓曰夫天也天可背乎由是養姑撫遺息
唯謹逮今四十年有司上其行旌其門閭二子
長托克托穆爾次托克托皆讀書有立王鉅山有序
至大辛亥六月二十七日題

婦謂嫁曰歸從一乃天理奈何世降後不恤再醮恥徒

觀三綱缺竟逐一波靡豈伊渤海鄉而有和拉氏精誠
洞金石誓言感神鬼天其可背乎我惟未亡耳鞠幼無
苦辛奉姑有甘旨黽勉達朝夕紡緝代完美悠悠四十
載曾不異其始旌表固有常榮耀非所企偉哉未嘗聞
三歎敬為起竒效尤可賀超卓見二子

贈山東轉運使圖克坦伯寧

我友安御史好善我不如曾中月旦評予奪入錨鉢自
言與君雅說君日無虛我時欲識君君在外府居

原注
時同

知山東
轉運事

愛而不得見搔首幾踟躕前年天降屯還我水

上廬君來相慰藉鬱鬱古丈夫所見逾所聞我友不我
誣去秋辱新作磊落皆璫璣知君平生學禮義為根株
時當九月尾上計朝王都課以天下最才名動鈞樞遂
登使節崇復此魚鹽區到家春已深楊花正紛敷樂事
吻相合掌中有明珠

原注伯寧五
十五始舉子

竭來枉南軒謙光照

寒臞舉杯為君壽謝去口不濡但稱聖恩優過荷非所
圖國用實浩汗時節要供輸民物喜動搖低昂繫慘舒

上欲國用足下欲民力紓上下各得宜此責誠在予所以受命來不敢自怡愉我起再拜賀君豈尋常徒憂國斯謂忠愛民仁可孚秉忠而行仁奉職固有餘願君保此道終毋替厥初故園有青山歲晚以為娛

佳禽

青林衆鳥集旦夕何喧啾
條來非予招忽去胡爾留
文采紛莫識宮商自相投
大哉天宇間萬化良悠悠

送蕭經歷

山姿淡朝曦春動濟水道皇皇祖帳設冠蓋何縹緲有
來衆如雲壯觀親翁媪洗盞拜道左行語遮復遶吾儕
鄙野人公德寧易曉愛公衣冠偉面澤鬢髮皓時時北
湖上僕馬閑且皎但聞吏誇說幙府公甚好溫醇金玉
資清耿冰雪抱不怒咸足畏不言信可保其重太山輕
其容夢澤小居然袖手坐公事一已了却觀獄市中清
肅如灑掃寧聞閭里間猶復有狂狡寒者日以溫饑者
日以飽循循諸子弟孝友相勸導感公有如此向天默

為禱公來既已遲公歸願無早乃今舍我去使我腸腹攪我情願誠私言語亦擾擾官家事功業求賢甚求寶巖巖中書堂寧可無此老終知不得留行且澤八表惟有願且祝康寧復壽考懇懃書此言以備國史討

雲中吳氏嘗為河東宣慰副使壬寅歲歲饑出粟賑鄉里李禪詩為徵詩皇慶二年三月二十五日書于大都寓居之西齋

晉饑秦輸粟謂是汎舟役秦饑晉可忘乃獨閉之糴千

年信史在其咎竟孰孰有無等豐凶彼此猶旦夕聖人
垂格言博施與周急吳侯何英特恥挹貪吝癖維時歲
艱食斗米凌尺璧毅然倒囷倉奔走傾郡邑人人舉手
謝不死今乃得嘗聞活千人後嗣封可必終知天祐善
書以為世則

趙子昂惠胡椒以詩謝之

胡椒生南海愈疾號神速悠悠風土隔所致或恍惚嗟
予抱沉寒嘔泄雷殷腹窮愁卧餘濕夢寐惟此物夫何

長者賜猥此衰病辱圭撮未可謀磊落忽滿目輕圓蚌
珠小玄瘦鼠李感外辛實英烈中淑乃溫郁緬懷君子
風畏愛不敢忽既將諧吾藥又以進我餽邇來未幾日
頗覺神觀復新湯火始然宿滯冰旋沒行當誇健飯庶
比雪就沃大哉功用殊信乃銖兩足癡人固可笑安事
八百斛我無英瓊瑤負感長愧慙

王黃華以橫幅畫其父東海散人道巾野服坐
長松下品石流泉韻致殊絕題其後

翁本神仙人宜著崑石裏高風邈餘韻益覺世俗鄙寥
然如素蟾淨照松下水黃華三絕手辦此一奇偉歎息
不可忘是父有是子

送何聰山侍御赴河南道提刑按察使

才難聖所歎自昔從何知豈無甚盛世千年百年期我
公實天生會此休明時公姿何華華想見皋與伊仰若
泰山重莫能測高卑望若滄海遠孰從得津涯先民有
遺書爛熳無不窺所適在有用文章乃娛嬉八年御史

府沉沉卧孤羆竟使公議定砥柱存綱維忽持使者斧
謂言西南馳翩翩舊驄馬聊以寫我思公去不可留公
歸亦無遲蒼生久懸望此責非公誰

蓋希顏蛻齋

物蛻蛻以迹人蛻蛻以心是心本虛寂欲蛻安所任豈
知虛寂內而有利欲侵荏冉初未覺酒酣與淵沉所以
為學者惟貴資道深涵養既有素本源詎難尋鑿石出
美玉披沙得良金僂僂蛻殼蟬豁豁遺巢禽超然事物

表無愧古與今此為蛻心說請為蛻齋箴

尚志堂

安宅化隘陋正路成阻幽僕御痛瘡死婦姑勃谿憂惡
濕更居下諱疾胡能瘳於此有人焉孤舟劈橫流築室
方寸地隱若百尺樓下連九軌衢輕車引驂騶出入何
坦坦獨坐囂囂遊勢利不得詘貧賤非所羞我起為三
歎傑哉真吾儔道果不遠人努力追前修

題梁鄒賈氏足樂亭

乾坤有真樂在我不在物達者乃得之其樂所寓足賈
生信佳士此理久自燭蕭然一茅亭氣壓萬金屋樂哉
誠樂矣我本無所欲

秋蟬堂并序

選部主事襄垣李謙伯溫所居秋蟬堂乃其
大父仲平君金泰和間所築後以兵圯伯溫
營而新之仲平君好鼓琴以道自潔武安紫
山胡公記之甚詳內翰潘仲德來為徵言余

勉書百言于後廐初命堂之意庶或彷彿云
白鳥竊膏血青蠅妬芳鮮擾擾蜂趨甘翕翕蛾就然觸
眼輒敗意堙鬱安所宣空堂一隱几悠然聽秋蟬蟬聲
何窈渺欲和膝上絃物生各異趣理契斯同玄蛻形已
拔俗不食豈非僊以彼塵外姿廓我胸中天漆園乃可
笑妄計小大年豈知彭澤翁獨愛晚菊妍

石仲璋廉訪以避暑詩見示次韻答之

出城遣歎煩灑若脫久疫平生丘壑尚重愛林野僻憑

危時遐瞻覽邃復遠適嗒焉忘憂樂跡與心俱寂日入
元氣回穹影湛虛碧

愛公如清風所至解民疫高軒何容與不厭窮巷僻出
處真兩忘鵬鷗同一適清詩八音作幽眠破虛寂欲往
不能留佇立烟樹碧

送范提領

北風振林皋蕭蕭吹行客離觴淡無味志士肝膽裂竭
來陽丘稅狼籍不盈睫本非蓬蒿人安事此屑屑鴻鵠

臂兩翅萬里誰能掣別後讀此詩可洗心內熱

比德泉

潔固不可濁浚復能有容鑒物無爾私利人豈予功偉
哉泉之德敢不勉厥躬

李御史清甫惠余以研乃端之紫石也肌理潤
而形製甚古所惜者偏足耳然余以意度之使
平用之無傷也詩以謝之

旅食無與娛挂眼止俗物此生來端溪故人薦我屋枵

然瞽腹偃炯爾秀兩目夫何足不良有口叵自鬻想當
適齊時忍垢蒙笑辱豈從獻王後抱石負深屈應慚失
所衛憂色未肯復三歎復拭之文雅溫可掬終焉不正
立臨几久髀飭遂令陶泓輩妄意希見錄物情固有殊
終始豈敢忽殷勤為文辭毛穎尚可禿慎勿泄我墨獲
誚同覆餗

清甫見和復次韻答之

君誠磊落士過眼不留物我亦偃蹇人衡茆等華屋夜

寒抱遺編藜火耗兩目枯毫久不濕片瓦孰為鶯阿端
畜君家一昔肯見辱誤傷爾非罪有價吾敢屈諒微希
世珍茲貺未可復當憲試玄雲清泚手自掬登函脫巘
嶮藉紙忘餽飢豈徒光客居自足供日錄緬思忝承乏
報效蔑絲忽物用有不如坐愧雙鬢禿新篇誠過望覓
腸飫珍餽

鬱鬱澗上松為智先生壽

鬱鬱澗上松靡靡松下草生平賴餘蔭朝夕仰真操霜

風脫衆木蒼然立如傲浩蕩涵雨露四時震枯槁所以
徑寸莖銘荷不知報工師索梁棟弗遠登廊廟繫我植
天墀千載為永好

題武仲經平反卷仲經為提刑書史錄安慶路
囚出獄成寃者一十二人

嘗聞雋不疑治獄多平反平反自喜多第怨獄益繁情
偽淵海隔孰能究其源請觀武黃岡所出皆其寃

書呂幽谷哀辭後諱慎字誠之絳人也自號幽

谷野人博學不仕以道自樂年八十終

潔身利安貞盤礴在幽谷執謂幽谷中而有光自燭優游八十歲全歸無不足含毫想遺風其人美如玉

書燕臺陳氏致樂堂卷

諸子皆問孝聖人言各殊言殊理可尋是殆舉一隅孝無賤與貴而亦無終初此心即親心異體實相孚但使誠敬足自致樂有餘

讀謝孝子傳

太山謝正卿能盡事親孝父殯猶在室隣火遽回燎

厚佳左

傳音去聲

至孝通神明於此見諄告又嘗吮母疽適遘和扁

療再病不可藥剗股得奇效風樹終身悲墓側六年報
子職固有常如此豈易到旌異明典制所重在風教衰
俗頽波委屹立有孤嶠移忠儻可期事業當遠耀

張兵馬美成索幽香亭詩

惟茲歷城南山水足佳麗若得高士眼可作終老計張
君誠不凡處心遠塵世誅茅起亭榭開徑樹蘭蕙衆芳

亦第進紅綠雜巨細天風一披拂幽香杳無際眷彼幽
香中而有君子致毋令俗物來又復敗人意

山東有義婦一首

山東有義婦夫乃秦之郎婦初適夫時羅襦照新粧夫
家徒四壁出門無耕桑婉然安其室紡緝仍薪漿所要
在百年黽勉同糟糠豈期官有役夫當戍襄陽襄陽大
江表路遠波濤長即為死生別割裂五內傷載顧乳下
兒孿孿六歲強須臾離君懷各在天一方君心非木石

胡能勉強防妾恨不出戶安知君存亡不如隨君往好
惡同在傍慷慨束衣起挈兒遂戎行間關與險阻萬里
涉風霜俄過鹿門山推車兒在廂邊雲下寒日林谷都
茫茫夜黑道路絕潛息野草荒有虎挾陰風怒激河水
揚嗥為震雷聲目作飛電光盤旋視三人意不滿一嘗
突前搏其夫齧去如拾芒婦時不暇畏赴救何奔忙翻
身曳虎足號兒刀速將拔刀走送母小兒亦非常一刺
虎斷脊再刺虎墮腸探手摘虎心虎憤如崩墻妖血雜

腥涎淋漓滿衣裳草木為震動天地為低昂社鬼及山
靈肅肅來蒼惶脫夫虎口下招魂返營房肉以為夫羹
皮以席夫牀氣義動三軍繞看皆彷徨勇者失其勇剛
者羞其剛大官共嘆息賞賜傾橐囊奈何夫痛劇十日
竟不昌快意在目前雖死已足償我始聞此事髮凜鬚
髯張由來食牛威有臂誰敢攘怪此婦人手如礫鼠剖
羊乃知精誠至萬物不可當世有臣子心能有此婦良
長歌序本末尚冀覽者詳

題都事于君所藏孫康映雪圖

孤蟾掛松枝積雪壓茅屋夜牕不繼火晝食定無肉脩
然雪中人把書牕前讀不須問勤學可洗萬古俗

失題

學際天人明理同聖賢語富貴貧賤間守謙行所素居
易物皆平持盈人免惡千里莫徘徊始終如一步

中庵集卷一

欽定四庫全書

中庵集卷二

元 劉敏中 撰

七言古詩

送選軍使者

至元太平之六年野蠶吐絲米三錢萬方同入富壽域
無為殿裏薰風弦百官奉職亦多暇雨露但急恩澤宣
精神堂堂折衝萬里外天青日白無烽煙坐令亘古不
臣國稽顙入貢爭相先蕞爾東南隅固醜不自憐委命

一帶水陸梁跨橋邊盡翻四溟波不洗從前愆帝曰可
徂征此舉功必全用卒當用勁蒐閱無頗偏使君奉命
來電影飛鳴鞭山東少年勇且健心欲報國知無緣一
朝被選入行伍感慨踴躍皆忻然山林列戈戟雲霞蔽
旗旛弓刀角彊利鎧胄爭華鮮鐵馬屯原頭植立如羣
麋當前視其氣已壓江淮孺咄嗟辦此一能事使君忠
幹孰齊肩雍容車騎今言還當有一言聞於天但云士
庶樂為用摧枯拉朽之勢已在臣目前長蛇封豕不足

慮露布竝見來甘泉車書混一兵亦偃應有辭臣載筆

來上平淮篇

原注是年大發兵圍宋襄陽

送親衛軍劉副都萬戶南征

勾陳天仗環紫宮羽林猛士如罷熊將軍超越世無比
帝遣督領專其雄腰金佩玉動光彩大冠長劒何穹窿
門前列戟秋水寒馬上錦鞶朝日紅長安少年氣欲盡
有如燕雀慚冥鴻檢身精慙不自足委節報國銘丹衷
包茅不入楚不共天意久欲驚頑聾一夕秋風動江漢

殺氣已滿秦淮東王師桓桓順時舉要浮一葦收奇功
我君陞辭即戎事密奉聖旨餘難同霓旌導前錦怕首
攬轡顧盼光生風沈幾遠畧不可識請纓未足言終童
眼中了了見囚虜指揮封守如旋蓬行當一掃氛瘴靜
南北混一車書通歸來獻凱奏闕下策勲定見超羣公
圖形麟閣表恩寵平生事業能始終應笑為儒例無用
長年螢雪悲途窮

送潘景梁之官常州

斷虹閣雨山雲濕岸草離離墜濃碧返照猶瞻苑樹秋
回頭忽作江南客毗陵山水更清雄季札祠傍秦伯宮
高節已經千載後試從衰俗問遺風

送王伯儀之官危山治

迢迢西北風吹起東南客離觴未盡山南歌征鞍已遂歸
鴻發人生出處不可度古來聚散多哀樂君將綠鬢犯
紅塵我坐滄洲搔白髮搔白髮苦憶君遠樹漠漠危山
雲萬金良璞君自重大璧玄圭他日用

王彥功為鄒平尹以卷索詩

君今為梁鄒梁鄒乃是伏生鄉城頭青山號長白上有
范公讀書堂伏生誠古儒口以墮典傳虞唐范公為大
賢左右文治生輝光想當二公時梁鄒之人感戴興起
孰可忘二公去已遠梁鄒之俗日荒涼問君胡為治化
導乃其方柔剛相濟治始平慎勿姑息梗與強芟夷蕪
崇之懲一勸百理最長風行草自偃實著聲洋洋願君
作邑止如此可與二公之德千載流餘芳

送北人韓飛卿

先生昔踏少年場
寶劍三尺書一囊
風雲才氣不自揜
憑高望遠心茫茫
遨遊四海求知己
白日青天誓生死
解裝呼酒洛城中
擊筑長歌燕市裏
功名未成歲月深
蕭蕭兩鬢黃
塵侵喜君如此
益自壯關河迢遞愁人心
人生百歲何處好
兒女團圓奉翁媪
單衣寒驢歸務早
秋風已滿長安道

驄馬行送李德隆赴行臺監察御史

李御史百鳥鶚千人英用如快劍新發硎亦若古鏡無
逃形三賓外臺幕河北山東俱有聲一辟烏府掾何公崔
公相歎驚朝廷重邊重選賢才力亦著甘涼城今騎驄

馬超金陵慷慨為歌驄馬行

原注時臺
事在建康

丈夫出處貴節義

義與死生誰重輕君不見張綱埋輪肝膽傾孟博攬轡
思澄清朝陽一有孤鳳鳴一鳴足成千載名不然從事
故紙末正可解印還農耕李御史鐵石腸冰雪顏平生
志願今始得勲業入手知無難過江驄馬人莫測北風

霜早狐狸泣

三山堂為張子京題

原注張號西泉監郡
建昌得三山以歸

西泉愛山有山癖行盡江南與江北
胷中磊落千萬山
獨恨眼前留不得最後乃與三山逢
平生所歷一洗空
三山可買況可載歸帆併借盱江風
徑來却掃西泉上
忽見三山屹相向一重一掩皆肺腑
萬壑千崑在尋丈
崢嶸太古勢倚天混沌意出太古先
崆峒盤礴含衆籟
呼吸元氣來其間烟霏不散花如霧
寒翠空濛濕冠履

更容何物著此間我醉欲眠卿可去奇章東第不復尋
平泉別墅秋草深千年得失存去取可以耳目遺其心
願君久敬如益友不負聖門仁者壽

原注太古崆峒混沌即三山之名

王澤歌

東平民王澤以米千餘石布五百端賑鄉閭
貧者李野齋學士為作序諸公為作詩蕭仲
禮持是卷徵予言勉為書此

一斗粟積乃倉一尺布盈乃箱箱盈倉積心愈長願春

不雨秋早霜細民失所歲且荒我粟我布價始翔十出
百入稱所望深局密鑄夜壑藏下抵四壁上屋梁鼠銜
窠數不自量動以一毫謂不祥一朝大盜窺爾墻渾舍
性命懸劔鋌坐視其有瞬息亡前日之積今日殃愚哉
若人庸可傷君不見散盡千石與千匹高枕無憂說王
澤王澤王澤豈無取人得汝恩天報汝

春晚山行路中見桃花

顧山道中春已歸東風作惡黃塵飛長紅短白零落盡

雜花狼藉爭芳菲
山迴路轉頗幽絕
兩樹野桃留春輝
嫣然一笑荊棘裏
便有清香襲客衣
恨君何苦輕妍姿
惜君不及春風時
鶯鶯燕燕時與期
西園蜂蝶渾不知
明妃遠嫁沙漠外
深溪空谷愁西施
行人往來不知貴
一生芳意終依依
我行於此偶相值
脉脉似欲道所思
碧雲望極青鳥遠
獨遠百匝空嗟咨
玄都觀裏舊時見
腸斷去年今日詩
徘徊良久不忍去
下馬為君簪一枝
歸時携酒重相過
祇應片片飛胭脂

野亭

野夫本自野乃以累此亭此亭豈有知汝惟未忘形手
持一盃酒中有山影青青山亦不言相與起吾醒半晴
不晴天氣濕欲落未落日脚赤山容林彩不得藏一杯
送我亭中涼

醉中聽智仲敬誦詩喜而有作

眉龐齒白歡頰紅足盤脅聳肩角隆兩手捉膝氣吐虹
目睨屋梁頂摩空搜如寒鶻望四野突若驚鷹超絕峯

須臾開口水湧風濶翻欲與長河東誰知乾坤萬古怪特
氣泄此方寸飢寒宵初為漢祖大風起次擬荆卿別易
水邈然古意動悲壯慘淡風雲酒罇裏忽吟結客少年
場吳鈎錦帶照座光恩讎生死一語頃凜髮直上鬚髯
張復為廊廟賡歌曲上有明明下穆穆民無夭札物無
疵四海一家均五福歛情却作行路難長鯨翻海虎滿
山李白悲歌阮生哭弊車羸馬愁長安酒闌日落風色
黑寒燈耿耿月掛壁微吟轉入楚騷經切切門前山鬼

泣客飲不醉慘不歡我獨起舞叫且譴文章大是寫心
具如君氣象碑旣誰能攀古人已矣不可望一笑逢君
千載上

送滕高甫赴京

九重金碧開雙闕日射五雲光
晔晔微香浮動軟紅塵
鳳凰麒麟踵相接丈夫分有七尺軀
口亦能言足能趨
誰令此地獨不往
俛首蓬蒿甘輦愚
濟南奇士滕夫子
涵茹古今經與史
歷艱涉險三十秋
長才老氣今如此

去年匹馬東南遊，淒風短劍隨貂裘。山川風土入感激，
歸來詩句餘清愁。乃今別我京師去，翩若驚鴻無反顧。
知君久鬱濟時心，滿腹奇言思一吐。春風旅亭花滿枝，
酌酒勸君君勿辭。後日春雲隔千里，相思無客寄新詩。

送杜書史榮季北上

憶初識君御史府，赤鳳石麟照庭廡。賞君英發與君遊，
不謂緱山乃其父。緱山大老文章師，平生恨不一見之。
阿戎風味有如此，一昔頓致平生思。後來見子齊西邑，

秋霜正凜分司筆剔姦抉蠹入纖毫狡兔不出妖狐泣
去年我居北渚東退食杖屨還相從聽君緩頰論利害
濤瀾浩漉春江風丈夫宦學如琢玉我為子凡三刮目
子今去我向京師京師大是賢豪窟一顧千金定有人
即看勲業到斯文野夫但學西城柳只辦迎君與送君
七月七日同潘君美智仲敬劉深甫泛舟飲華
峯下醉歸中流遇雷雨大作衣盡濕明日呈三

子

雲頭黑風飛海沙風邊白雨如懸麻扁舟一葉落中浦
眼前不到漁人家禽魚靜息洲渚暗寒氣蕭蕭明草花
忽乘敗傘展未暇已作橫潰無容遮飛湍走浪乍開闔
時見電影明金蛇疾雷捲水掠舟過雲暗不整舟橫斜
舟中狂客醉膽壯引手欲挽阿香車拊舷叫笑助聲勢
物外寧有張騫槎天應知我浣塵土為濯葛衣洗烏紗

和王詳議處士詩韻

古人白骨秋草枯藐然節義猶遽廬龍淵化作蛇虺窟

乳稚童牙皆丈夫姓名聞說處士老口不敢詰心掖虛
新詩老筆喜入眼輕財禦寇緩急趨乃知元氣本無間
季末何嘗殊厥初我期斯人如鳳雛百鳥失避竹與梧
我期斯人似初月光焰已射羣星疎

趙文甫持沼水儒者李誠甫思忠行卷求詩其
事則輕財赴難之類姑掇其大概而賦之

男兒結髮事姬孔豈甘沒世無聞終闢茸處心常在衆
人先凡馬千與萬焉知渥洼別有汗血種今也威州乃

有豪傑士不待文王策高踵財空鉅萬敦骨肉身起窮
冤解紛冗馮煖甘辭火券名實郎頓失投縲勇一身都
是仁義氣我始聞之驚且竦衰俗靡靡頽波遠著手誰
能為障壅豈期今日有斯人便合巖廊佐垂拱更看盡
展濟時具風采一新天下聳不應猶作處士詩大筆勒
名有南董

雙峯詩并序

吾友韓雲卿得佳石高廣纔尺許而兩峯萃

然拔起並秀翠潤可掬几研間尤物也雲卿
題之曰雙峯甚寶之然世有好高而賤卑誇
大而忽小者皆不得其心不造其理者也作
是詩以遺之以為雙峯他日之辨

韓公飲酒不飲客眼中猶見蒼龍角劉子賦詩不賦物
為渠鑿破造化窟君不見三峯挿雲海內絕正與崑山
作丘垤君家此峯矗矗不盈尺吾謂三峯乃其匹太始
而來有此質元氣崔嵬入吾室靜畫無人照心碧乃知

世間小大短長相勝無窮極何必圖南為得搶榆失萬里要須同一適西來三叫信筆題韓子不言領其頤雙峯忽與霄漢齊

清明後一日西遊諸公見和寒食游繡江韻亦復和云

春山隱隱橫春浦岸上桃花嬌欲語人家臨水籬落幽門外炊烟出青縷三三五五踏青來恰逢天氣霽風靈一笑使我心顏開落花隨入飛香埃尋幽覽勝不忍去

斷腸十步九徘徊溪東督郵風味惡擊鼓吹笙竟寂寞
溪南有酒濃于春留當金龜與君酌西望太白橫峨岷
醉膽輪囷半天落丈夫莫忘平生心氣義未幾江海深功
名富貴果何物臨風一曲留春吟留春吟為君訴莫使
韶華等閒暮歸時應過黃家溪更為繫馬垂楊渡

有酒
濃于

春一本作從
事良於人

北城泛舟借用昌黎公山石韻

北城日長煙景微落花蝴蝶作團飛青萍綠浪榜歸渡

春深谷口溪魚肥江山佳處豈易得人生但恨行樂稀
閑牕空腹五千卷一字不療寒與饑村肆喚酒為君飲
正有山翁來啓扉欣然就酌鱸銀鯽水氣入腮雲霧霏
鵲華相對兩奇絕南山一帶皆屏圍當檐幽鳥轉新啼
何必更須金縷衣門前過我誰氏子青衫驄馬黃金鞵
憑君且踏紅塵去滿船明月須吾歸

謝趙子昂同知惠梅

原注趙杭人時
為濟南同知

詩仙愛梅愛徹骨夢寐江南煙月窟歷下寒多梅事稀

西園兩樹還驚目多情細揀春風枝把翫頓慰江南思
數枝還許分送我鄭重要作梅花詩白梅嬌怯黃梅瘦
沉水谷瓶春一竇暗香無柰惱殺人小窻酒醒寒蟾透
起來琢句句不神問花不語花應嗔詩仙明日當更笑
不識江南浩蕩春

八年重陽後六日漕司陳知房輔之邀遊龍洞
書於祠壁

我昔與山未相識朝夕倚門望山碧乃今兩足踏山骨

恨山不能言與我論此太初之胃臆但浮嵐積翠杳靄
於前兮雲淒淒而風激激忽風回而雲開兮穹林峻嶺
甕抱而雲合千尺懸崖削青壁黯黯兮龍潭陰窅窅兮
神穴黑若將出光怪而轟霹靂衆賓相顧而無言兮覺
森然其動魄主人乃展白雲之天屏掃蒼苔之石席酌
以兕觥戒以鯨吸發豪興兮萬丈將一飲而千石俄而
紛然解襟頽然岸幘不知酬為主而酢為客而山之與
我忽然而為一兮豈有乎或今而或昔雖天地亦不知

其何為兮況於世之悲歡與失得俄聯轡而歸來後之
遊者尚或發一笑於狂生之醉墨

次韻賦田澤卿假山

幽人在山花滿庭琴聲度竹風泠泠目送去鳥凌青冥
回巒曲岫往而復何處浮花水流出長安之中有盤谷
我驚造物如畫工游戲長與我輩同故著幼與岩石中
原注京師田澤卿賢而不仕家庭為假山有峯巒洞穴
之勝瀑流激其中上為六小亭為三橋回互往來竹樹
掩映芳菲之間甚自樂也諸公皆有贈篇賈侍制
彥載曾為微言于予因用揚損齋學士韻書于後

損齋詩

附

三峯上下五六亭三橋曲折一清冷松竹落落花冥冥
山林長往恨不復朝廷一入嫌不出爭似君居槃澗谷
想像賦詩雖未工山水之樂非苟同樂地在吾名教中

觀拾麥行

去歲秋冬時雨雪不濕面今年春夏交二麥不滿眼各
家仰饑寒愛重甚蘭畹盼盼秀欲齊蹙額庶可展復遭
霜雨作半為風所僵餘者僅能熟狼藉踈穗短缺然田

畝間似不忍芟剪老翁行腰鑪暴露背負炎稚兒推車
力不足老婦隨行手自搗苟使饑腹饜辛苦未死誰能
嫌傳聞縣吏下村去鞭扑但說催征嚴老翁傷心淚先
泣稚弱相看空失色舉頭但聞人語喧荷畚負擔俱汲
汲東隣有寡妻滯穗爭掇拾袒裼手附刃俛首不得息
赫赫日馭亭漚漚汗雨滴黃埃滿面無人恤饑渴何曾
飲與食近前為問何人家窮困年來如此極我竭我心
力歲歲勤播植恒產未敢期官租不暇給今年天降饑

重我憂戚戚汝亦何因緣受此饑餓厄
荅言我本富庶民平生未省艱與辛
一從構得青州禍舉家計業隨煙
塵三年流竄無北着斷蓬飄泊風中
根憔悴歸來閭井改桑田滿目惟
荆榛頽垣敗屋重修緝驚魂稍定
尋比隣城中斛粟貴如玉載顧四壁
無錢緡朝食南山橡暮採西河芹
昨朝里胥急叩門逼促要輸絲與
銀踰垣四走不敢出意緒恍惚憂
紛紛潛來於此拾遺滯敢以口
腹辭辛勤幸圖一飽免溝壑官長
豈不哀我貧君不見

朱門犬馬餘梁肉萬庾千倉飽童僕窮歡極樂錦綺筵
日費千金猶不足何當買牛多種田盡力向天祈有年
剩與官中充府庫我亦飽食鼓腹忻忻然

玄鶴引贈琴客張晉卿樗隱

原注晉卿
京兆人

鍾期知音伯牙鼓琴鍾期既仙伯牙絕弦琴亡人去三
千年恍惚逢此子不記伯牙死淋淋元氣在其指正音
再見天地始四旁無人孤月明玄鶴下來山鬼聽山鬼
泣俗耳驚手譜四百操傳心不傳聲千年復一鍾期生

始識有無張晉卿

原注晉卿集琴阮譜凡四百餘首皆精妙

題燕山許文仲餘歡堂

原注取東坡先生治生不求富讀書不求官之

詩也

生不治而餒書不讀而愚此外富與官有命不在吾一
堂俯仰吾願足不羨六印歸來金錢撐破屋

中庵集卷二

中菴集卷二考證

第三頁後二行 案漢書濟南郡縣十四二曰鄒平四
曰梁鄒後漢書濟南郡縣十七曰梁鄒八曰鄒平則
梁鄒與鄒平為二縣此詩益借用

欽定四庫全書

中庵集卷三

元 劉敏中 撰

五言律詩

至元十一年清明遊舊都南塘呈黃咸卿賈榮
甫二知己三首

忽到南塘路萋萋草已深鶯花逢晚景樓閣靜春陰觸
望空多感思歸只獨吟惟應愧知己款曲百年心

蜿蜿紅橋遠森森碧徑深遙山昏野色流水亂城陰燕

去抄花舞鶯來隔柳吟如何行樂地獨抱故園心
楊柳金絲亂桃花錦洞深偶經流水曲絕似故山陰竟
夕窮歡賞歸鞍兀醉吟燕遊償不遂暫慰客中心

春困二首

長日兀如醉閑愁情似禪暫來拈筆寫却又枕書眠落
絮風餘態飛花舞後妍東樓懶回首雙燕正翩翩
盡出愁中樣如逃醉裏禪不禁花惱思幾被鳥驚眠春
事渾無賴晴窗強作妍多情雙蛺蝶為我舞翩翩

卜平章壽燕

早悟程張學遙傳孔孟心披雲捧堯日與歲作商霖曠
步通賢路清陰滿士林中堂介眉酒浮動北山岑

運泰風雲合年豐日月長入朝無滯事退食有清香社
稷憂誠重詩書樂不忘所行惟所學夙意在虞唐

題采水縣尹劉漢臣詩卷首章乃御史中丞仲
公詩也

令長承宣寄幾權輔弼均一言開歲喜百里作冬春圖

治當今日馳聲有此人中臺品題在不負甌生塵

錢安思承赴四川提刑副使

憲府同班日

原注思承與子
昔日同為御史

吾鄉會面時殷勤百年意

感激寸心知遽爾參商隔居然歲月馳聞君遠入蜀何
用慰相思

題張智甫牡丹讌集詩卷

好古仍好客愛花尤可人栽全洛陽譜占斷濟南春國
色微吟筆天香襲醉巾相看惟老樹寂寞繡江濱

贈鵬舉充鄂囉

居簡仍多藝循華却古心律科高史業詩學振儒林聖主
昇堯日蒼生渴傳霖兵曹聊可遣努力在朝簪

才鑑人難比文章筆有神幾年頭角異三語姓名新去
去搏風翼洋洋縱壑鱗他時黃閣上不似舊詩人

同簽樞密事張子惠於京師私第構一室扁曰
西巖西巖指其鄉樂城西山而言示不忘祖先
桑梓也以卷徵言為書四十字十年丙午六月

也

密省寡孤鶚知君迥不凡九霄依北闕一室對西巖肺
腑紆清賞松楸感至誠門風百年舊氣象日嶢嶢

長蘆李仁甫母趙氏守寡三十年年六十三卒無
恙時有為薦聞旌表者趙辭之仁甫兄弟二人

求詩

惟知所天重敢以此身輕苦節終完節辭名更有名青
燈耿虛室白首會佳城欲報天無極哀哀二子情

送王守道安撫之官威茂

投筆風雲動揚鞭羽翼生青山送離別白日照精誠遠
俗聞聲喜同遊羨爾榮慙勲一杯酒更為老人傾

完顏士慶以安西理問至京師授四川省左右
司郎中君請於宰相得覲省來濟南給傳赴官
其行也詩以送之

官程驚客夢驛騎又駸駸落日旗亭遠高秋劍閣深天
長望雲意歲暮倚門心早晚歸歟好金杯重細斟

寄西野尚書

遠吹流遺響淒雲弄薄陰秋隨江樹老寒入草堂深多
病頻妨飲孤懷漫廢吟流萍赴滄海何處問浮沉

王秋澗哀挽

學與天淵博名隨事業新文章早無敵字畫晚逾神冥
躅追前哲遺芳澤後人獨憐秋澗月猶照玉堂春

挽王朋益

偉器明時出英聲早歲聞夜絃鳴白雪秋翮入青雲遽

失千金壁空存四尺墳流風傳不泯猶足張吾軍

送張希孟秀才赴禮部掾

冥漠文章脉來從太極先欲求寧有得已絕豈無傳廓
廓英華表悠悠土苴邊愛君千里馬為贈繞朝鞭

禮樂春官府清時重選賢飛翔從此地昂聳看他年遠
器含餘蘊橫波下衆川古人忠孝事耿耿要君全

題楊朝舜挽章後朝舜先由濟南府判入為集
賢待制除知孟州未至而卒

玉樹瀛洲望甘棠歷下思千金求絕筆萬口詠新詩
洒落何人似詠諧亦我師河陽不肯到空作九原悲

送李伯渥監稅潭州

為別期三歲征商效一官長沙憶卑濕楚甸入荒寒
白雪知音少青雲得意難聲名隨處有努力莫盤桓

春晚洞庭麗秋高湘水深感時傷遠客撫事費長吟
鴻鵠九霄志驂騑千里心洪鑪百煉後精絕識良金

挽尚書簡公詩

原注字敬之大同人

志學將期用輸忠可憚勞功成沙漠遠名出士林高
清
禁承三接華軒映六曹中途鬱遺恨不及友夔臯

徐伯弘御史見過

車馬瞻雲表茅茨自水濱繡衣迎漢使白首問堯民萬
里風謠得三生臭味親忠勤有公等愧爾太平人

原注
是以

時伯弘巡行
山東諸郡

和鵬舉冬日閑居五首

賢哉魏夫子吟詠樂潛居筆有千鈞力胃涵萬卷書已

評君若鳳無怪我知魚肯就陳蕃榻時過靖節廬

白日無多事清溪靜僻居陶情五字句寓目數行書敢
望乘軒鶴或如困輟魚豈為兒女態瀟洒愧門廬

開簾媚風日清寂若仙居匱有荆山玉家傳孔壁書形
骸本麋鹿交友任禽魚回首蜀川道陶然愛舊廬

棲迹城中市游心物外居篆煙時作縷蠹葉偶成書仕
顯伏轅驥身閑縱壑魚崢嶸卿士宅瀟洒野人廬

為病成幽隱如禪學靜居心中惟慕道名不係除書林

美來幽鳥淵深止巨魚執鞭如可富吾豈戀衡廬

題燕處士劉實從義墓銘後

一代耆年望千秋處士名眼中聊遣興身外久忘情有

子迪清範無人尋舊盟高風在寥廓搔首愧平生

原注從義

之子彛授廉訪經歷不就

憶鄭處士

隱者俱承詔斯人獨避名文章成汨沒冠蓋絕逢迎食
粥家人瘦耽書弟子清經旬不見面相憶每愁生

濟南醫學教授王荆玉用內侍薦被召以詩贈之

四海思齋老三年厯下城官聯頗閑冷技術自神明推
轂當途事徵車此日榮即省宣室見端不負平生

原注
思齋

荆玉
自號

范冰壺者故玉壺先生之子以方技進好學能
詩來求言故贈之

名學有餘力妙齡無不能貴聯金馬客清出玉壺冰射

覆追方朔詩慕少陵長風九萬里刮眼看雲鵬

聞智仲敬教授歸自曹南

念汝三年別聞今千里歸闕堂鋪木榻植杖倚荆扉日
夕行人歇天長去鳥微病懷渾欲豁回首轉依依

明水張受益掾江淞省蓄古物甚富以博古稱
自號古齋頃赴調京師除本省檢校過家其行
也以詩贈之

博古仍希古如君古亦稀識窮三代遠疑正百年非久

鬱披雲望俄瞻衣錦歸明朝又南北把酒一依依

來繡江以麥送仲敬有詩見謝次其韻併簡趙

文卿提舉

昔擬攀龍客今同食鴈鄉素懷寧易託良覲每難并遽枉驪珠重空慚兔首輕衰殘一如此那復問才名

未能幽興愜空柰別愁牽悵悵隨耕稼悠悠度歲年江山回白首煙雨滿青田想見壺中樂相携醉市廛

高唐監郡鄂爾多和托拉系出西域折節下士

讀書樂善士夫稱之兄弟六人而君為季其父
獨以君襲是職監郡凡三世矣作忠順堂居之
因郡人元恒齋正卿來徵言贈以二詩

系族來何遠文儒夙所耽白眉班在六皂蓋世傳三政
體宜深得民情亦飽諳眼前忠順字元不是虛談
順有當行理忠無不盡心一堂非麗構兩字是良箴事
業皆中出名聲豈外尋家門日光大益覺慶源深

送石仲璋侍御赴河南肅政廉訪使

原注大德四年之冬

十月


矯矯秋天鶚蕭蕭憲府驄光聲滿河右良覲憶山東寥
落客懷惡留連尊酒空相思有新句休忘北飛鴻

次韻荅憲司張文絃經歷及其屬凡五人見寄
之什

地壓東藩重司分北戶陰人材信灑落詩壘更高深同
作孤羈立相和五鳳吟須知正始作不為鄭聲沉

出奇如曲逆多辨似淮陰峻削天根夤清連月窟深文

章千古貴情性幾人吟聲色雲霄外何處古價沉
奇貨驚寒目長風破夕陰神交一字重義盡百年深漫
愧齊東語難忘洛下吟不眠搔白首消盡博山沉



中庵集卷三

欽定四庫全書

集部

中庵集卷

四至
六

詳校官中書臣張虎拜

侍讀臣孫球覆勘

膳錄監生臣嵇承羣

膳錄監生臣張曾壇

膳錄監生臣范維城

欽定四庫全書

中庵集卷四

元 劉敏中 撰

七言律詩

代送宋廷秀員外

妙年勲策不易得今日省闈君最優
兩鬢春風山映秀一襟清氣水涵秋
雲烟總屬坡仙筆魚鳥難留李白舟
此去應將便民策皂囊封上解宸憂

送韓御史彥高賑恤西域仍用安思承御史韻

好語飛傳近使旌遠人先已動歡聲馬頭白草迷邊雪
夢裏丹心繞帝京壯歲勲勞君自得浮雲富貴世空驚
歸期儘擬明年早從此金鑾識姓名

至元丙子初赴上都赤城至望雲道中

曉日曛曛過赤城

原注地名有驛亭

風烟遙接望雲亭

原注亭名州事

在馬亦名云亭

好山解要新詩寫瘦馬能搖宿酒醒高下野桃

紅漫漫紫迴沙水碧泠泠人家剩有昇平象滿地牛羊

草色青

十三年秋次韻答友人余時掾西曹

西曹事罷獨登樓。塵慮紛紛更暮愁。
鄉國別來如昨日。京華旅食又今秋。
簾垂夜雨寒燈細。門掩西風落葉稠。
翠袖金鞭五花馬。可能閒伴謫仙遊。

清風白酒香滿樓。我酌與子澆閒愁。
西風遼海一片雪。落日太行千仞秋。
達人自與衆人異。俗事常兼官事稠。
安得談天漆園叟。相期造物與同遊。

霍主事清甫留宿上都宣徽後亭是夜覓酒不

得

窈窕軒窗淨客心
愛公朝市有山林
清風急雨傳秋早
淡月微雲覺夜深
一榻清歡非宿約
百年情話入幽吟
幾時有酒來呼我
剝與燈前細細斟

為茅屋解嘲

昌黎辛苦三十載
始見京師有屋廬
莫笑偏聯四簷草
且圖容蓋一牀書
寒餐暑虐應無慮
坐誦眠吟已有餘
明月不知分醜好
一般清影照庭除

東村寫興

野水平坡數點鷗，遠村高樹一聲鳩。
出牆白簇蠶初老，滿地黃雲麥已秋。
文舉自宜官北海，淵明只合事西疇。
行藏了屬乾坤管，一笑誰能獨倚樓。

冬至和彥博

原注二十六
年京師作

僻巷無人載酒過，小窓燈火自婆娑。
睡方到眼夢還短，事不如心愁更多。
官柳野梅春欲動，長庚殘月夜如何。
書雲定有豐年兆，願學田翁擊壤歌。

送按察僉事趙國寶分司淄青

名高氷蘖湖南幕人避風霜憲府驄

原注國寶先為湖南道經歷擢監察

御史嘗前論事有不畏強禦之風

論列不違天咫尺澄清還到海西東

物情可見分休戚吏治難平是異同
饑渴疲瘡正翹首可能離別惜忽忽

樂御史

鴈塔題名接泰和聲華此日較誰多
鐵冠獨立風霜表竹馬猶傳父母歌
自薦英才歸大老肯容濁水亂清波

神遊一去尋無迹惟見荒丘蔓薜蘿

留別杜醉經侍御

原注公到官不數日而某得請自京還濟南二十七年也

侍御新班趨北闕野夫行李向南州清談不得一樽共
苦雨空為三日留濟水波聲驚客夢太行山色動高秋
他時驛使如相問翠竹籬傍有白鷗

呈杜侍御時余為臺掾

一入霜臺白髮生且看如此欲何成四知自守神應鑒
三語雖賢衆所輕月旦有評甘下客雲霄無路接羣英

便須及此春前後歸買山田趁雨耕

壽高提學

酒酣落筆寫新詩氣節依然年少時渭水久疎垂釣侶

原注公年八十有六

鏡湖新得放生池

原注時上司始以大明湖為府學贍養地故有是句

國人矜式尊黃髮後學服膺肅絳帷壽考康寧是天意
祇應吾道要扶持

吳興卜德甫自江左平失母求之四方過濟南
以詩投余次其韻

孝心行李兩艱難風雪長途海岱間一自亂隨青蓋出
孤飛不見白雲間窮年淚盡三江水旅枕魂驚萬里山
早晚春風舊桑梓肩輿重喜壽昌還

次韻答鮮于伯幾見寄

舞雩春暖記同遊一逐風塵各異州白髮青燈千里夢
楚雲燕樹十年秋淵明寂寞惟栽菊杜甫飄零漫倚樓
休為長吟廢沈醉只今懷抱不禁愁

次韻答子昂見示三首

自許羲皇遠俗情爭教光價重連城一官何異湖中隱
三絕休辭海內名隆典遺音知有望明堂巨構欲誰成
不才愧我終無益白髮蕭蕭日夜生

肯過窮簷愧素情可堪風雪對寒城東藩自合高軒駐
北渚慚非處士名山鬼來聽七絃作邦人傳誦一詩成
沙鷗也要公相識只待明年春水生

遺情應未到忘情猶愛幽居僻近城夜夢是因寧有說
太初生物果誰名人間白髮何年種世外丹砂幾日成

獨自無言搔首坐篆煙銷盡暮寒生

答趙明叔見寄

耕有田園織有桑西臯遙接玉輝堂

原注公新作此堂於長清

牙籤

潤展藏書架碧甃方開洗硯塘此老誰能測高趣我曹何幸挹餘光
近來聞說多奇釀幾日容教細細嘗

次韻答衛山齋見寄有序

表兄繡江公歸自華亭具言山齋先生之學之德之盛為之竦然徐示先生辱貺五詩及

學易管見一編詩則深濶雄麗辭達而情稱
博雅之言也管見則以象數明其體而達乎
理變互伏肖竒正極其用而會於一易之蘊
盡矣嘻學成而人不知君子不為病玄經隱
乎哉謹取五詩首篇韻述答萬一諒不以簡
畧罪

故人說子我書空又見詩文有是公地拔孤峯衆山下
源開一水四溟通雄章此日詩聲北古學何年易道東

尚友猶須論千載相望何計馬牛風

湯泉詩

錦州之治西南百六十里海邊有廢城如塊
今謂之桃花島吏民數十家巡檢司在焉出
北門少東城足再舉武平地湯泉湧出西東
凡三池相去丈餘而西池獨盛石甃八角輪
廣僅三丈泉出如貫珠然流而常盈人云天
下如此泉者蓋多恐不至是烈也常投生藥

試之須臾可食近池西北為屋屋中為木池
連石渠引水以浴非濟以他水則指不可下
屋背即臣河深澗流泉暨浴水泄焉河自北
來至泉所折而東逝亦名湯河因泉也余頃
年為風瘙所苦諸藥莫驗或言得湯泉浴之
當已求之未暇也大德癸卯春以奉使宣撫
山北遼東道六月至廣寧所苦復作未幾遇
是泉甚喜會百姓訴水害乞食為料理留數

日凡三浴而去比再浴疾已失矣嗚呼誠有
德哉乃作詩書呈同浴奉使達實公郎中蘇
君彥輝韓從義張禮卿兩外郎以無忘泉德
且以貽巡檢房中使時脩之不致居人過客
他日有汚廢不治之歎亦無窮之利也房資
幹敏吾言當不負云是月望後五日濟南劉
中庵題

地底誰將土鑊然靈源一沸自何年引來餘煖心仍畏

滌去沈疴骨欲仙
日浴滄溟暗通氣
舟焚赤壁悄無烟
厥初若得京城出
九市蘭湯不值錢

奉朝命釋囚東山暨提刑霍君清浦同登登州
蓬萊閣

半夜潮聲撼客床
起瞻紅日上扶桑
一天雲景相明滅
萬古仙山隔渺茫
海市不償詩眼債
驛塵空點鬢毛蒼
且乘萬里長風底
捲取滄浪共此觴

何右丞壽日

兩朝恩禮未應疎四海勲名不自居倚重今方在元老
雍容時一到中書黃封敕酒詩成後寶篆凝香客散餘

以右丞商量
中書省事

上都答耶律梅軒左丞見贈

參戎初識文昌府衣繡重逢海岱邦尚記春波送南浦

不忘明月上東牕相門出相人空羨家學承家世可雙

遺我新詩慰牢落他時何處話灤江

原注昔與公同事
兵曹嘗有明月上

東臆十詩頗當公意後每見公輒誦之海岱邦謂公提
刑山東治吾州濟南時也公中書湛然之孫左丞相雙
溪之子博學多能尤長於詩時行省高麗至
是來朝會于上都故有是詩灤江上都水名也

送楊彥寬廉訪致仕歸黎邱

原注君行四方誌其山川風土為書

藏於室號四遠堂云

早年鞍馬事弓刀晚節風霜凜俊髦四遠向來名已重
一閒今去跡尤高老當益壯真吾事存不知亡豈若曹
想得鄉鄰候居處黃華白酒滿東臯

原注時大德丙午秋九月也

趙方塘挽章

原注方塘諱與栗宋宗室也台州黃巖人江南始平以徵至闕下奏

對切直稱旨授翰林待制遷直學士後為直學士嘉議大夫年六十二卒於官始終凡三十年

歸葬黃巖

塔山之原

冠蓋當年起隱淪
混同南北靜風塵
一飛雲路九千里
終老玉堂三十春
德比珪璋能取貴
言如藥石不醫貧
魂兮剩有歸鄉樂
夜赴黃巖月色新

韓雲卿新居有序

灤水上有樓曰江山勝槩樓下有泉曰無憂雲
卿居有之吾又安得無言乎哉

我愛西城韓御史新居樂事總相宜
泉中就啜無憂水樓上閒吟勝槩詩
紅燭瑣窓秋晚後蒼山老樹雨晴時
向來一念無人識說與沙頭白鳥知

由湖亭泛舟抵華峰下作

南洲未了北洲映東水乍分西水流
不盡草花隨遠近相忘魚鳥自沈浮
儒冠誰識蹉跎意杯酒真成笑傲遊
日夕山風吹醉醒雪濤和月撼歸舟

次某參議韻

小院幽花晚自芳
遠簷高樹弄微涼
深盃病後十分淺
短髮秋來千丈長
幾日夢魚占歲稔
當時騎馬趁人忙
荷香不斷山如畫
灤水源頭是我鄉

恩州東陽驛廳壁有王黃華詩石刻用其韻

悠悠馬首幾時東
坐食官庖底計功
失得豈逃當世論
行藏終愧古人風
十年往事驚秋鬢
半夜微吟答候蟲
遙憶草堂溪上路
綠蓑烟雨正濛濛

次郭安道韻二首

城中無處避炎蒸
雲水招邀別有朋
移我繩床近高竹
脫君紗帽掛寒藤
心便靜域全消酒
齒冷新詩不嚼冰
一朵芙蕖如雪白
莫教容易點青蠅

往年朝紱曳宮羅
此日江村買釣蓑
禪榻髯絲人事少
竹梢蓮葉雨聲多
文章豈有潛夫筆
歲月空驚織女梭
聞說今秋足豐稔
作詩傳與老農歌

苟正甫由監察御史出為南道勸農副使乘驛
輦母還鄉作詩送之

得失窮通豈偶然看君事業識君賢
揮鞭蜀險三千里懷節江壩十六年
歸路正當新雨後負輿還在使車前
官衙未要嗟閒冷忠孝天教此日全

溪塘納涼二首

晚天涼日澹籠雲高柳清風便可人
蓬蓽略無黃閣夢烟波舊與白鷗鄰
松花影落圍碁局桂葉香飄漉酒巾
憶著功名仰天笑幾多裘馬走紅塵

平湖微雨落輕雲探做新涼借與人
僻地蕙蘭芳自好

空山猿鶴淡無鄰
草堂甫舍忘言樂
蓬髮何妨墊角巾
莫便佯狂出門去
門前蜀道滿風塵

五言長律詩

大舅魏知事壽

畢萬初興晉
穰侯復相秦
蕃昌知有繼
業履見彌新
既學方從仕
昭先務檢身
才猷何藹藹
文質更彬彬
竭力扶公室
推恩及國人
典型資潤色
政化賴經綸
素厲松筠操
端為社稷臣
江陝識威武
天闕達忠純
餘慶歸蘭

玉高門踵鳳麟誕辰今日遇和氣一家春赫赫光華盛綿
綿福祿臻只應窓下樹從此賀莊椿

律詩二十六韻壽智先生

積善家傳久達仁利靡貪肯堂真有力行道復無慚美
秀人難並清純性雅妣瑤林春照日璧月夜明潭古學
期終制前猷每細參多才追屈宋博物儷僑郟魑魅降
嘲弄乾坤入討探銀鈎飛草聖玉塵亶清談對客開琴
匣揮盃撫劍鐔英聲初外播茂實久中函昔在監司辟

名非記室堪壯懷元落落衆目已眈眈情偽何勞識艱
難亦備諳勇辭新仕版喜對舊書龕鑿逕疏清泚開軒
納翠嵐幽蘭香馥馥脩竹舞毵毵尚志希龍鳳何心顧
雀鷁聖朝更化美遐域湛恩覃冠蓋詢遺逸山林起負
擔駕行思拱北鵬翼看圖南祿必鍾論萬榮須日接三
子方秋介壽我有酒盈甌薄獻庸非敬多言實匪甘川
流雖學海青出敢忘藍窮達聊雙遣歌呼共一酣異時
能事畢攜手訪彭聃

中庵集卷四